

Date –03/09/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Tourism Minister Pu Lalnghinglova Hmar chuan vawiin khan Homestay 199 sakna tur a tlangzarh .
- 2. Mizo Inneih leh Rokhawmna dan ennawntu Review Committee chuan man leh mual chungchangah Nuta man hlan chu chin chhunzawn ni lo se a ti.
- 3. India leh Belgium te chuan kum nga chhungin. an sumdawntawinna a leta tihlen an remti
- 4. Supreme Court chuan Bar Council of India (BCI) chu Law zirlaite chungah thununna lek turin thuneihna an neihloh thu a sawi.

<><><>

TOURISM

Tourism Minister Pu Lalnghinglova Hmar chuan vawiin khan Homestay 199 sakna tur a tlangzarh a, Tourism Deparment buatsaih Empowering Community Homestays Ceremonial Launch & Capacity Building (Under BANA KAIH, PM-JUGA and CSR Initiatives) Programme ah tlangzarhin Heng Homestay 199 atanga 100 sakna tur sum cheng nuai 540 hi Mizoram Flagship programme Bana Kaih atangin hmuh a ni a. He Bana Kaih Homestay hian MLA constituency 40 a huam ang.

Homestay din tura thlante hi Progress Partner tih an ni a, Sum hi October thla-ah release tan tur a ni. Homestay 89 sakna tur sum cheng nuai 500 hi PM-JUGA hi DA-JGUA scheme atanga hmuh a ni a. Hei hi tribal homestay scheme a ni. Khaw 12 a huam ang. Homestay siam tura thlan chhuahte hi beneficiary tih an ni. Sum hi October atangin release tan tur a ni.

Homestay dang 10 sakna tur sum cheng nuai 49 hi Indian Railway Finance Corporation Ltd te CSR atangin dawn a ni a. Thenzawl leh Serchhipah te sak an ni ang. Hemi hnuaia homestay bik hi MTDA in a enkawl ang.

<><><>

TEACHERS DAY

Vawiin hian Mizoram hmun hrang sorkar leh private sikul - ah te Zirtirtu te ni (Teachers Day) hman a ni.

Zirtirtute Ni hi zirna ngaisang em em tu India ram President pahnihna, Dr. Sarvepalli Radhakrishnan pian champhaphak lawmnan kum 1962 atang khan September ni 5 - ah hman thin a ni a, kumin hi Zirtirtute Ni vawi 65-na a ni.

Kumin Zirtirtute ni hi Inrinni a a tlak avang leh Sept ni 4 chawlh a nih avangin, State Working Committee rel angin vawiin hian sorkar leh private school hrang hrangah mahni remchan dan leh sorkar ruahmanna angin zirtirtute ni hi hman a ni.

Vawiin zirtirtute ni lawmna hi sikul tam zawk ah chuan zirtirtute chawimawin an an pula hun hman niin, zirlai naupangten zirtirtute chawimawin nan thilpek an hlan a. Chief Minister Pu Lalduhoma leh School Education Minister Dr. Vanlalhlana'n Zirtirtute Ni pula chibai bukna thuchah sikul tinah chhiar chhuah a ni baw.

Kumin Zirtirtute Ni pual hian chawimawina National Teachers Award dawng turin ram puma zirtirtu thlan chhuah 48 zingah Govt. Lunglei Electric Veng High School Headmistress Pi Lalnunmawii chu thlan a ni a, September ni 5 hian New Delhi-a Vigyan Bhawan-ah President Droupati Murmu-in a hlan dawn a ni.



REVIEW COMT ON MARRIAGE&DIVORCE

Mizo Inneih leh Rokhawmna dan ennawntu Review Committee chu an Chairman Pu Zahmingthanga Ralte, Law & Judicial Department-a Addl. Secretary ni baw hovin vawiin khan Secretariat Conference Hall-ah an thukhawm a.

Man leh Mual inhlannaa Thian man leh Nuta man bakah Nu man chungchang pawh ngaihtuahin, Pu Zahmingthanga Ralte chuan Thian man chu mi nawlpuiin inneihna kan kalpui mek dante thlir chung leh Perry Sap Dan -ah te, Mizo Hnam Dan 2006-ah te a lo lan tawh avangin, huam zau zawk a telh chhunzawm an rawt dawn tih a sawi a, Nuta man erawh chu hman ngai loh thil leh chin thar mai nia a lan avangin ching chhunzawn lo hram turin Mizo mipuite a ngen a. Hei bakah hian Nu man chu hringtu nu chauhvinn a ei tur, chupawh man dawngtu a nih loh emaw pasal nei tur-i pa nen an awm hran chauhva a ei tur a ni a, midangin Nu man an ei thei lo, a ti baw.

Pu Zahmingthanga Ralte chuan Review Committee Member-te chu Mizo chhungkaw tin khawih thil ngaihtuah an nih avangin, uluk taka an ngaihtuahnate hman tura nengin, The Mizo Marriage Inheritance of Property Act, 2014 chu Mizote tan bik chauh a siam 'Mizo Personal Law' a ni a, ram dang mite bakah Indian ngei hnam dang leh sakhaw dangte tan pawh a duan a ni lo tih sawiin, anni pawhin Personal Law an nei hrang theuh zawk a ni a ti.

Chairman kaltlang hian Committee chuan, kumin Mizoram Assembly Budget Session-a Mizo Inneihna leh Rokhawmna Dan siam that 'The Mizo Marriage & Inheritance of Property (Amendment) Act, 2026' angin Kohhran hrang hrangten

Inneihna Certificate an pek chhuahah ‘Divorce’ tih thumal chu ‘In accordance with the Mizo Marriage & Inheritance of Property Act, 2014’ tia thlak vek turin Kohhran hruiute a chah a ni.

Vawiin thutkhawmah hian Sawrkar aiawhin Law & Judicial Department leh DIPR officialte bakah Kohhran leh tlawmngai pawl aiawh: Council of Churches in Mizoram (CCM)-te, MHIP General Hqrs. leh MUP Hqrs. aiawh te bakah Women Commission Chairman leh Mizoram BAR Association President te, MZU mithiamte leh helam a tui mi sawm bik engemaw zat an tel a ni.

<><><>

RIPANS GRADUATION

Regional Institute of Paramedical and Nursing Sciences (RIPANS), chuan vawiin khan RIPANS Auditorium, Zemabawk – ah Graduation Day vawi – 26na an hmang a, Health and Family Welfare Minister Pi Lalrinpuii chuan a hmanpui.

Pi Lalrinpuii chuan zirlai degree nei tharte chu nunkawng bung thar an zawh chhohna turah harsatna hrang hrangte hmachhawn tura inbuatsaih a pawimawh thu a sawi a. Beidawng duh lo, teirei peih apiangte chu hlawhtlinna in a hmuak thin a ni a ti a. Khawi hmunah pawh awm se, midang tana tangkaina nei tura chahin an thiamna zir chhuahte chu kan mihringpui te hriselna enkawl nan tangkai taka hmang turin a fuih a ni.

Minister chuan RIPANS chu Mizorama zirna in pawimawh tak a nih thu sawiin, India hmarchhak State 8 atanga zirlai kalkhawmna a nih angin, inpumkhatna hmun tha tak a nih thu a sawi a. Hnam ziarang hrang hrang inzirtawwna, inpawhtawwna hmun pawimawh tak a nih avangin Institution chhuahsan hnua hinkungkaihna tha an siam tawh chu chhawm nung zel turin a chah a ni.

RIPANS Graduation Day vawi 26 - na hmanna ah hian discipline hrang hrang atanga zirchhuak, zirlai 276 hnenah degree hlan a ni.

<><><>

P&E

Power and Electricity Department chuan karleh thawhtanni ni 7 atanga ni 10 chhung khian Aizawl khawpui chhunga Electric Bill leh Smart meter chungchanga harsatna neite tan a bik taka complaint thehluh leh chhinfel runpui a buatsaih dawn.

Kan corr report ngaithla ang.

Power & Electricity Dept hian RDSS Scheme hnuaia Smart Meter vuah chungchang hi thlahlui khan Minister Pu F Rodingliana hovin an sawiho tawh a, meeting hian smart meter hman ngei ngei a ngaihchhante sawiin, India ramah electric kal ral tam tham tak tihhniamna turin, Ministry of Power chuan RDSS: Loss Reduction Scheme a duang chhuak a, he scheme hnuaiah hian Smart Meter vuah runpui chu ram pumah neih a ni ta a ni an ti.

Hetihlai hian, harsatna tawk tamtak an awm avangin, Assembly thutkhawm hnuhnung berah khan MLA Pu Ramthanmawia chuan hemi chungchang hi sawichhuakin ngaihven ran a tul thu a lo sawi tawh bawk a ni.

Mizorama smart meter vuah anih hnua harsatna neite tana hun hawn chhung hian Aizawl khawpui chhunga bill counter zawng zawngah officer leh staff duty tura ruat bik ten complaint booth an thutchilh dawn a. Electric Bill leh smart meter chungchanga harsatna neite tan hemi hun chhung hian complaint theihluh theih a ni dawn a, chinfel nghal theih te chinfel a ni ang tih Power & Electricity Dept chuan a sawi a ni.

<><><>

MUALTHUAM N CASE

Tualthattu a puh Denghmingthanga, Police Custody atanga tlanchhuak chu a ni thumna vawiin thleng khan Police thahnem takin an zawng zui a, hmuh a la ni lo.

Kan corr sawi danin, Vanhne,Thuampui dai leh Hmawmgva lui ruam leh Tawng lui kam vel thlengin an zawng a, Branch hrang hrang YMA te pawhin Police hi an pui a, chanchin lakkhawm lai thleng hian hmuh a la ni lo.

A bo zana lock up a duty 2nd BN MAP Constable Lalnunfela chu suspend a ni tih 2nd Bn MAP Commandant Pu Francis Lalnuntluangachuan vawiin khan PTC Lunglei a hrilh a, hemi zana duty dang erawh suspend tulna awm a hriat anih loh vangin action lak a ni lo a ni.

Hetihlai hian Southern Range DIG chuan leave a lak avangin vawiin tlai khan Eastern Range DIG Pu C. Lalnunmawia chuan Southern Range DIG charge a la ve nghal a ni.

<><><>

TANHRIL MURDER CASE

Gauhati High Court Aizawl Bench-in Tanhril nula Marina Lalchhanchhuahi tualthihna chungchanga an thuchhuah hnuk kir tura a tih angin Mizoram Police chuan kumin January ni 27-a Press Statement a chhuah tawh chu vawiin khan a hnukkir.

Mizoram Police Headquarters chuan Office Order a tichhuahah Pi Laltanpuii Vs The State of Mizoram & 7 Ors. chungchanga Mizoram Police-in Press Statement, kumin January ni 27-a a lo chhuah tawh chuan Police Manual for Media Briefing a chang thenkhat a kalh ni-a Gauhati High Court, Aizawl Bench-in a ngaih avangin, High Court duh dan angin Mizoram Police Press Statement lo siam tawh chu kohkir a ni.

High Court hian thla liam ta ni 31- khan order tichhuakin, Mizoram Police press statement chuan police-in mipui hnena puanzar theih chin inkaihhraina dan a bawhchhia tih tarlangin ni 7 ral hma ngeia press statement chu hnukkir turin a hriattir a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



CEO VISIT SAITUAL

Mizoram Chief Electoral Officer (CEO), Pi Garima Gupta chuan vawiin khan Saituala DC Conference Room ah, ERO, AERO leh political party te a kawm a, Special Intensive Revision (SIR) 2026 an kalpui dan District Pisa Confernece room-ah an thlirlet.

CEO chuan electoral roll-a inthun thar beihpui thlakna Special Intensive Revision (SIR) 2026 chu tuang taka a hmawr an bawk thei chu lawmawm a tih thu a sawi a, chanvo nei zawng zawngte thawhrimna fakawm a tih thu a sawi.

CEO chuan SIR 2026 kalpuina kawngah Saitual District chu an che tha hle tih sawiin, sawiselna an dawn loh thu a sawi a, Final Roll tlangzarh tura tha taka inbuatsaih turin kalkhawmte chu a fuih bawk a ni.

Saitual district AC pathum Chalfilh, Tawi leh Lengteng Assembly Constituency Draft Electoral Roll 2026-ah hian voter mipa 26,573 awmin, hmeichhia 27,420 an awm a, a vaiin voter 53,993 an awm a ni. SSR 2025 nena khaikhinin voter 2233 (zaa 3.97) in Draft Electoral Roll 2026-a voter awm zat hi an tlem zawk a, hei hi chhan hrang hrang- pem te, thi te leh roll-a chuang nawn te an paih vang a ni.

Electoral Roll siamthat hna hi kalpui zel niin, form thehluhte endikna neih zawh a ni tawh a, Final Roll hi ni 7 Thawhtanni khian tlangzarh a ni ang.



PM

India leh Belgium te chuan kum nga chhungin an sumdawntawinna a leta tihlen an remti. Vawiina Prime Minister Narendra Modia leh Belgian PM Bart De Wever te an inkawm hnuah inremna hrang hrang ziah a ni a. Ralthuam lama thawhdunna te, renewable energy lama thawhdunnte, cyber Crime leh diplomatic training lama thawhdunna tur inremna te an siam a ni.

PM Modia chuan thuchhuah siamin Belgium leh India ten mipui rorelna an dah pawimawhnate, sumdawinna lama eibar zawinna leh mipuite inpawhna chuan an inkar inzawmna a ti nghet a ti a. Kum 10 kalta khan Belgium a tlawh thu sawiin kum 10 chhunga ram pahnih inlaichinna nasa taka a thang chu lawmawm a tih thu a sawi a ni.

(*News on air*)

<><><>

SC

Supreme Court chuan Bar Council of India (BCI) chu Law zirlaite chungang thununna lek turin thuneihna an neihloh thu a sawi. Supreme Court chuan heng law zirlaite chungang dan anga hremna emaw thununna lek thei chu an zirna ina thuneitute an nih thu a sawi a. Chief Justice Surya Kant-a kaihhruai bench chuan he thutlukna hi siamin tunhnaia NALSAR university zirlaiten convocation-a CJI sawm anih an dodal avanga zirlaite chungang BCI thiltih a khak a ni.

(*News on air*)

<><><>